

輝縣志卷十五

輝縣知縣黔筑周際華石藩纂修

藝文志一

制

元

翰林承旨姚樞贈諡制

王 構

昔有先正蚤事聖皇惟夙夜單厥心而終始典於學如伯益之贊夏禹暨尹躬之佐成湯行乎仁義之途任其社稷之重計於廟堂之上明夫事幾之先盖精神志意之相孚故啟沃都俞之靡閒制難拘於一例恩特侈於屢書故翰林學士承旨中奉大夫詳定禮儀使贈榮祿

輝縣志

卷十五

藝文制

一

大夫少師文獻公姚樞以淵識宏謨爲國蕃蔡以清彝素檢爲時楷儀曉萬事安異同式羣工一統畧周旋必禮温温維德之恭敷納以言蹇蹇匪躬之故止殺允符於宸慮宣澤不應於天功以故終和且平近者親遠者附不賞而勸大臣法小臣廉國家之表裏可觀風俗之樞機隨轉績已成而弗有身愈退而彌尊顧當時耆壽其誰歟致今日隆平者公也正事正言正道親傳文祖之燕謀有功有德有能首被先朝之鴻訓肆朕纂承之始於公簡注之深槐序延登衣仍袞黼棠陰未徙胙迺龜蒙因諡以正其名崇章以介其祉於戲得天下賢才斯足矣方圖政化之新有朝廷大議則就之慨想儀型

之舊往欽茲命以永其傳可加贈嘉猷程世舊學功臣
太師開府儀同三司追封魯國公仍諡文獻

記上

元

耶律公新廟碑

王博文

究觀載籍夷考往哲或有德而不得其位或有位而不
得其君或得君而不遇其時或遇時而柄用不久致功
業無聞名聲鬱闕者可勝數哉若夫負經世之志事有
爲之主遇可行之時居久任之位諫行言聽膏澤浹於
天下爲當代佐命元臣者其惟先正中書令耶律公乎
公遼太祖長子東丹王諡讓皇帝之八世孫金道陵朝

輝縣志

卷十五

藝文 記上

二

尚書右丞文獻公季子字晉卿不書名尊大臣也人品
瓌璋器宇宏博六經諸子之書百家眾流之學莫不該
貫尤邃於天文星厯壬遁卜筮之術太祖皇帝雅間公
名徵詣行在相見恨晚一之日束帛加璧二之日黃金
百鎰夜半前席晝日三接乃其常也從上之西征也馮
牙之際雨雪三尺上以問公對以必克之象庚辰冬大
雷上問何徵對以梭里擅死於中野皆如其言又回鶻
司天奏五月月蝕公曰不蝕及期果然後一年公奏十
月望月蝕回鶻奏不蝕至其夜果蝕八分自時厥後凡
天動星變伐叛取國莫不咨諏休咎之應罔有差忒上
常語侍臣云公天上事尚知况人間事乎又嘗謂太

曰天以此公賜我家爾後庶政當悉委之如魏道武之得崔浩遼太祖之得韓延徽亦不是過國俗稟朔漠施強之氣統狼虎必勝之師天威所臨罔不振蕩靡滅公每以救人命爲己任至東印度鐵門關得能語之獸上怪其異召公問之公對以此獸名用端出見則主天降禎祥於國家欲陛下之神武不殺也於是旁近數國舍而不伐詔卽日班師神道救人權輿於此聞燕薊留後嘗私怒殺人以車載其首者公惻然憫之曰不意法之弊以至於此遂奏下令凡應死者申朝待報自是郡國諸侯不敢擅殺矣其扈從太宗之渡河也汴京旅拒日久城且潰近臣奏國有常制悉當屠夷上將從之公百

方諫止之曰所以爭天下者本爲土地人民也得地而無民將焉用之統計其所全活何啻百千億萬人乎老子曰天將救之以慈衛之其後以戶爲戶破折丁爲戶之說收宣課以供國用塞中原止可牧馬之說本息相侔止債家徵羊羔之利盜無顯迹革事主虛報之償繭絲則戶止一斤田租則畝止三升商稅則三十之一迄今以爲制者也括戶以後民多逃亡各路申聞公奏免三十餘萬戶減租賦二之一以戊戌旱蝗奏免當年差稅又奏軍民各異兵不與民賦民不與兵役迄今以爲利者也而又止漢地拘牝馬之請止天下刷室女之請約法十八章以範民陳財務十策以立政皆施行之太

祖皇帝謂天以公賜我者豈徒然哉秉鈞軸二十年天下受其賜者不可縷數四時之序功成者去公既薨謝之後柄政雖欲繼公經綸之規模難矣天下之民豈能忘之也汲郡共山百泉有安樂窩州民於此構祠宇塑公像而祀之舊矣至元辛巳之春公之孫希逸爲木道憲使奠拜祠下睹其椽棟欹傾階基圯裂神儀暗翳慨然嘆曰吾祖功存王室澤在斯民而祠廟弗稱旌紀寂寥乃命厥其廟貌新其像設俾來以書以祠記見屬博文謂善化一鄉智效一官者猶且碑去思而頌遺愛若公之功德雖黃童白叟皆能頌而歌舞之况秉筆之士當簡淇園之竹墨百泉之波大書特書而不可已者豈有

輝縣志

卷十五

藝文 記上

四

愧辭乎至於興禮樂立制度恤刑罰定官制建國家萬世憑藉扶持之基者皆不暇著著其實惠之在民民之不能忘者以昭示永久公之子中書左丞相名鑄字成仲希逸丞相之第九子也其餘諸子布列臺閣寺監皆有能 聲公平生所積宜其有後如此也莊子謂九萬里風斯下者以其所積之厚也其流慶方隆而昌乎銘曰阿衡佐商爰陟成湯尙父作周涼彼武王蕭張輔漢房杜相唐聖賢相逢治具畢張以奠入極以紐乾綱維中令公異世同方巍巍明堂公爲棟梁浩浩巨川公爲舟航興邦有言制國有章民方仆僵公生不傷民方告飢公食糗糧民方號寒公衣襦裳旣死而生旣賤而良

民戴公恩天地莫量尸祝社祭未稱報償百泉之旁百門之陽有赫者靈公之廟堂丹雘塵暗庭廡草荒公之諸孫峩峩奉璋來致孝享徘徊涕滂葺舊增新益大以光邦民歲時禴祀蒸嘗荔丹蕉黃桂酒椒漿千秋兮萬古永祀公兮不忘

思親亭記

白棟

共城西北五里有山曰百門山下有水曰百泉萬脈珠湧輝淨澄澈流而不濁卽詩所謂泉水也近可以溉秔稻轉碾磴於本境遠可以漕糧餉濟商旅於海門其旁則修竹茂密翠如琅玕其中蓮芡芬芳爛若雲錦岸花秀發四時畫圖林鳥和鳴竟日佳唱遺山所謂煙景獨

輝縣志

卷十五

藝文記上

五

覺蘓門多者卽此地也泉之上有祠祠之神以王封曰洪濟威惠王像而祭之以司此水祠之上有孫登嘯臺康節安樂窩盖名賢嘉遯之地昔人愛其景物至有身雖未到夢寐已至太行之麓者今之富貴利達位至宰執三公往往亦置別業於茲爲他日徜徉之計每春禾夏交四方以香火奉王祠因而遊賞以醉歸者盖千萬計實河朔之麗境中土之奇觀也魯齋先生之寓是邑也時與門生弟子一至泉上吟風詠月悠然而歸家無甌石之儲心有天地之春雖曾點之風浴舞雩明道之過乎前川樂不踰是固異乎眾人之觀矣其後去而爲徵君爲祭酒爲宰相爲學士清風滿黃閣英才遍天下

致政而歸覃懷又嘗一過焉先生歿後四年其子嘉儀許尹衛而是州乃衛之屬邑故得以公事時至祠下而於其先大夫遊息之所每致思焉思其親至其處其處在其親亡盖必戚然於中潛然於外有不能自己者乃於祠後山巔聚亭之下特構一亭而扁曰思親以致其意嗚呼侯之思親可謂切矣吾意侯之思親不止於是也侯將爲善思貽親令名必果將爲不善思貽親羞辱必不果讀詩禮則必思其過庭之訓履霜露則必思其罔極之恩以至事上之思忠莅民之思敬居處之思莊交友之思信盖無時無處不用其思非至是而方思爲標以銜於人也今旣成矣俾後之游斯地登斯亭

觀斯名聞斯義者皆有感於其心其親在則恐其念已不至於流蕩而忘返其親歿則亦觀感而化惻然而興懷侯不獨思其親使人亦思其親非止一人思其親眾人皆思其親人人思其親則風俗厚而教化行推之天下可運之掌於爲衛乎何有不然則徒爲觀覽之具遊賞之資而已是豈侯之心哉雖然侯之親我之師也生與子之分雖殊而師與親之義惟等先生平日所以教我者莫非至道我之所以不爲君子之棄小人之歸者皆其力也自先生歿後鄙吝復萌舉世求一人髣髴近似者以發藥之竟不可得則我之思爲何如哉况棟自去歲改任燕南不幸過衛而吾父棄養而亦權厝於

州之側所謂思親亭者雖未嘗一到而改火之間盖屢望見焉既以思吾親又以思吾師是吾之思雖不因亭而發亦因亭以深之也屬侯請記其本末遂書以告來者謹記

筠溪軒記

王 磐

共城之西八九里有泉不依山麓漏出平地名曰卓水水之上有故竹林地數十畝兵亂以來荒穢不治鞠爲樵牧之場地主操券而鬻之積年莫有顧者重元子李君與其友茅君伯達爰自相臺戾止茲邑將以選林壑之幽而卜棲隱之勝或以水上之地告二君欣然出鉢囊中金買之芟其荒穢理其凋殘疏清泉以溉其根插

輝縣志

卷十五

藝文 記上

七

密棘以郭其外於是雲梢烟葉生意燦然若喜其遭遇知已脫出困阨而遂有生之樂者也越明年新笋巉巖凡三閱歲而豐圍修幹十倍其初重元子一日謂茅君曰吾生平學道於世無求惟喜延接士大夫及願得方外耆宿數十人坐而奉之每以力不稱心爲恨今也環堵之外有此君數十萬足以奉齋糧則吾之宿心可以遂矣於是繕厨竈以潔齋饌構東西兩堂以舍道侶又於西堂之北斫竹爲徑迤邐西北行百餘步登畧約渡溪水當藥圃之東北隅構小軒榜曰筠谿以爲遊息之所盖非嘉客不能到也軒之大僅容十人而林壑之深邃雲烟之肅爽魚鳥之間逸木植之芳馨每至其上

人神情灑然如踐異境盖亦山林之奧壤福田晦昧秘藏之久待二君而發之歟予來居蘓門之歲二君始買茲地今四年矣而成就若此且向也爲樵牧之場今也爲藏修之地向也人過之而不顧今也遊觀賞玩而不厭物之盛衰興廢固有數存其間歟予惟喜二君之心其始也取人之所棄以致工而不辭其勞其終也推已之所有以奉人而不專其利斯亦賢矣哉遂爲之究其本末援翰而書焉

重建

聖廟外門記

王公儀

昔我世皇御極端明治本敬告多方必先興隆

輝縣志

卷十五

藝文記上

八

宣聖廟學俾教養人才以備擢用廟宇損壞卽爲修理責專長吏一遵彝典其規模可謂宏遠矣建列聖相承亦以文治爲先務大本旣立風化遂明下至鄉社之間亦有建吾

夫子之廟者矧蘓門山水明秀甲於天下自昔賢士多來卜居如姚雪齋許魯齋王鹿庵諸大儒相繼教授於斯其受業之徒若王西溪雷苦齋王春山白素庵先考秋澗公尤其特達者也禮義由賢者出人材因教養以成故我輝文風視他郡爲獨盛厥後諸公出仕官僚參雜怠於奉行彝典人物渺然之嘆盖有年於茲矣至治壬戌春西臺御史田侯來知州事下車謁廟見大門頽敝遂

謀諸僚佐洎讀書尚義之士皆欣然贊襄乃命工伐石斷鰲爲柱者二上則疊拱重櫺翬飛翼棘復刻木爲鯨魚勢極踴躍撐柱前後罔俾顛墜望之若老蜃嘘天突地踴出一奇構也增壯儒宮溪山動色社長劉聚等來請曰吾州

廟學自州長司公奉訓重建後曾無顧念者逮我邑田侯暨其同僚於撫字之暇不費公帑不勞民力重建神門增光於舊若不紀述恐不聞於後予告曰學校爲國家元氣守令係斯民休戚今之爲州縣者不過從事簿書期會而已其下則內以權術自任外以形勢自尊其視學校之修否斯民之休戚何關於心哉如田侯茲舉雖未能極崇儒重道之美其推原治本急所先務亦賢矣哉乃爲書之侯名良輔字君佐懷之夏邑人

楊公德政碑畧

王 苛

州尹楊侯下車首明治體移善風俗敦勸農桑力興學校不事虛文以期實效律已至廉奉公惟謹孜孜矻矻修明治化先是州凡所需資用槩取諸民民不勝擾乃推爲第甲置牌籍刻書姓字遇事無絲髮間貸賦役始均闔境稱便分憲按部至州喜曰公務至靜簿書又簡以他邦較之不可得也如是可銘銘曰倬彼楊侯知是州首明治體敷王猷風俗純美庠序修大本旣立民不偷時惟吏風尚貪培吾諳女久民賊蠹藥弗瞑眩疾弗

瘳存其悛者去其誅民失教養甘下流訟訐日起如寇
讐踰年化洽政治優公庭無訟獄無囚民逋有賦誰之
尤反映見在曾是羞侯歷簿籍根所由積弊違典章再
投繼維物力均而周協濟庶事稱優游適逢饑饉食弗
調共負租債徵索稠哀此窮瘁中心妯抑彼富強待斂
收作新州廨朝夕籌藉潤公帑寮俸鳩木植瓴甃積如
邱卜辰興役值父憂趨奔喪制難借留侯既去矣空歌
謳若論其理民寧求載其清靜利弗哀至廉用和剛濟
柔義風慷慨燕趙侔一方得所侯庇庥今思遺愛慙何
醜惟有昭報揚其休大書貞珉光千秋

重修七賢觀記

劉 賡

輝縣志

卷十五

藝文 記上

十

河內之地負上黨抱京洛翼以滑臺蒲坂其土沃腴其
氣溫燠其草木妍秀其生物蕃滋而山陽又其佳處也
魚稻梅竹泉石之勝爲尤升高四望繡張畫館地號七
賢鄉俗相傳晉竹林七賢所遊處余以史考之諸君屬
魏晉交仕宦未甚貴相與爲方外之遊此地近洛許而
僻山水秀絕其來會蓋無疑况濤河內與夫康之鍛秀
之懷舊籍之遇孫登皆可推見且遺蹟頗存歲在庚子
余寓居蘓門距山陽餘一舍嘗再過之嘆其境環奇獨
七賢無祠廟一酌明年秋道士王志賢者髮皤然請文
其七賢觀碑始知有祠在道之南古矣經亂頽毀久比
歲因故址以修今僅修完飾余忻然諾其冬歸自覃懷

遂一詣焉蓋其地北峙大山名白鹿崑實太行之秀出者雄峭峻偉聯障疊屏左石門右百巖連延絡繹羣峯齒如屋旁有泉數脈湛澈鑑眉鬚噴珠瀉雪衍爲河南去前則竹林茂蔚雜花十餘種環祠古木參雲陰森蕭邃纖塵不到是宜爲諸君牲醪香火地夜艾雪霽月明起臨泉上水天一色竹光樹影交翳橫布大禽動波心格磔有聲疑鬼神倚杖凝立若與諸君接音容恍惚間見其痛飲劇談超軼放曠殊自快適晨興仰視山色爛斑草木皆成琪樹渾然若太素時泉氣瀾漫與旭日相晃盪竹中鳥叫嘯有聲甚可樂也迨歸復眷眷久之翌日志賢復來丐文余因言曰惟七賢當魏景元中政入

司馬氏更革在朝夕諸君不肯效賈充王沈之徒附麗扳援希富貴顧乃翩然集幽處寄身杯酒若與時相忘其高懷逸韻出風塵之表固爲一代之佳士雖然三代之後世失所學下者趨合時勢以功利爲事其上則一意高遠齊物我混得喪豈知吾道自有本元至於臨患難處危疑當權其義之輕重而去就取舍又何必違逃正教假借外物耶觀諸君其始若欲保名完生蟬蛻於汙俗卒之亦有不免者或復與世低昂可勝慨歎是以君子不慕高遠不好奇異不就褊狹不處汙穢惟大中至正行乎天地間其進退行藏以時變通無所底滯故人不得而闕世不得而害則夫易所謂知幾詩所謂有

則子思所謂時中孟子所謂浩然賈生所喻麟揚雄所擬鳳此非涉世之舟梁衛身之羽翼耶惜乎七賢之不遇殷周而遇魏晉也余故表而出之以爲士鑑云

明

遊百泉書院記

王 教

余嘗欲登太行凌絕頂振衣雲霄覽徹寰海然後訪古
蘓門濯纓泉源旋車書院以謁

先師孔子升堂入室憩息優游天下之樂一也猥以叨史職兼經筵嗣擢宮坊復掌南翰念則切身未暇焉乃茲入賀辭還遂道共城城右盖百泉書院也行轡西轅可以暇及維時共大尹太原方侯肅請命駕余嘉侯之器度

輝縣志

卷十五

藝文 記上

十二

若非常政成而有餘裕禮恭而無僞爲出與遊償夙願矣侯曰不可弗記因併及夫院以書名俾究厥實書者何凡典籍皆是自昔授書禁解購求薦興古遺書斯輩出間亦多贗非巨眼莫辨折也迨後則蘭臺太史編摩百代稗官小說各就一家加之楮筆利作刻繡字行書益類集至難枚數是故授徒育才業以書專賓賢舉能義以書取君子之用世行道亦惟書籍焉是資所以學宮旣儲編頒於山長書院也雖然此猶待中人淑晚進姑以是爲造端焉耳若夫聖賢之道搏而有要千帙萬軸匪所思存今考尙書乃古帝王之言行政事易有辭自文王周公始刪定贊修又孔子暮年絕筆也前哲

聖所讀何書卒之懋德齊天立言垂世民到於今戴之
乃若經笥書囊錦心繡口豈曰無文聖域孰造書之不
貴於多也明矣孔門以一言蔽詩亦以一言爲終身可
行書紳靡越於數語請事亦止夫四勿斯善讀書者也
否則誦詩三百亦奚以爲多歧之惑亡羊彌甚是誰之
咎歟申公云爲政不在多言余謂讀書亦然顧所以求
諸心措諸身不違乎吾性之仁耳仁體事而不遺猶天
體物而無不在書之道胥具此矣有子首著其本孟子
繼推其實止皆並舉夫孝弟至論堯舜之道天下之平
亦惟此二言盡之可見道不遠人爲仁在我書以記載
事足傳習也善讀者當自得焉

輝縣志

卷十五

藝文 記上

十三

遊安樂窩記

王 教

方侯以我過共城甚歡慶且曰君子至於斯者未嘗不
訪夫蘓門余曰諾侯乃率賓從具樽俎備禮設樂爲百
泉嘉會感今憶昔邈爾興懷非徒曰賞心樂事而已酒
旣行出遊山於是鄉貢士郭君瑞甫王君澄甫乃亦從
余度泉源循山麓聯鑣履巉凌高眺遠翻欲御長風出
塵表遐想大觀未能卽遂也相爲依沿雲厓迤邐北下
約轉折纔里許以得邵子之安樂窩以入其室以瞻拜
其遺像焉故雖疑其此新祠非故址然而窩之取名寓
意寔大則又三致稱歎云舊聞此窩之在當時亦惟繩
樞甕牖環堵蕭然不如今之祠屋煥然足稱華居也堯

夫則安之樂之可以覘其中蘊矣天下之安土者樂天厚望於世必多怨尤其是故安則不求於樂而自樂未有樂焉不本於安者顏淵不改其樂孔子樂在其中皆先隨寓而罔不安以故浮雲視富貴用則行舍則藏無一曰非樂堯夫之安樂名窩知非外狗精蘊在中盖有取爾也九京孔厚往哲難作孔顏所樂遺書足證仰而溯求亦曰安仁而已矣樂天而已矣求之無遠安土卽是世人之忘其所樂滔滔皆是者不知安之爲安故也君子則何以爲安素位而行居易俟命焉爾能由是則聖域可企孔顏在我希邵者宜先於此義圖之可也

遊嘯臺記

王 教

輝縣志

卷十五

藝文 記上

十四

由安樂窩東北行以陟以降以歷東巖之絕頂緣崖冒雨清興逼人回視二子則亦吟襟欲放不以倦辭凡古跡皆訪求也乃復轉而南轅約不百武以得嘯臺焉登之見石刻爲空同記文者已與仆碑俱折爲三數段矣纔幾何時頻至於此而况自今以後孰保其物各有主鬼神阿護哉考蘓子序言則知登之居若土窟於今所謂三仙洞者或其遺窟也決非此山之峻絕崎嶇四曠不毛無田園水泉足資日用之未可居者升其堂視其遺像卽其人論其世設處其地代其對不能不歎乎處世非易人生之有不辰也夫士行如登豈不宜縉紳京朝宣力藩屏以獲大用夫幼學乃以隱耀沉輝竟止於

善嘯焉貽名君子可以觀世變矣夫嘯雖一藝猶從容自肆也昔人之結木巢棲塞戶竇伏資身賣卜傭工灌園甚至爲卒市門毀形易面欲一嘯亦鮮能何哉未得從容曰肆也是豈不幾炳先物蚤見豫待以追往哲之遺風惜皆一介一隅焉而已索諸聖軌皆未有循皆不可以訓徒過爲自全計而嘯若否何有哉詩云其嘯也歌舒忿懣也登之嘯無乃有所舒耶繹其話言祇欲避世道無古今世焉可避潔身亂倫士非獲已馭世者至使賢者避世嘯傲甘心結綬彈冠誰以相慶故曰可以觀世變矣

百泉書院記

劉健

輝縣志

卷十五

藝文記上

十五

蘓門山麓衛水發源泉脈仰出者以百數故其地名百泉東南距輝縣治七里境擅幽勝晉孫登宋康節邵子元魯齋許氏姚樞氏竇默氏皆嘗遊寓於此而邵子寓此尤久時李之才攝令共城因傳其教學以重當時而名後世於是百泉之名始著書院之建則始於河南提學僉事吳君伯通吳君病時流學務枝葉不根理致嘗白撫憲李公衍建四書院於河南境內以祀前賢而勵後進百泉其一也初議專祀邵子旣而更議祀宋濂溪周子邵子司馬溫公明道伊川兩程子橫渠張子晦菴朱子南軒張氏東萊呂氏元魯齋許氏凡十賢以姚樞竇默二氏配議旣定乃檄衛守張君謙營財費輝縣丞

孫懋庠生張德表等董工役以成化庚子四月始事至壬寅三月畢工凡爲屋三重爲楹六十有二扁其前
先賢祠中曰講道堂左右爲齋凡入後曰主敬堂爲齋凡四合扁之曰百泉書院乃選庠生之秀敏者盧瑋等數十人肄業其中吳君親爲定教條每行部至輒率令督課焉未幾吳君以憂張君以致仕相繼去而李公亦入爲戶部侍郎今提學僉憲石君淮衛守張君咨所以督課之者視昔益嚴又規置旁近常稔田若干頃爲之瞻石君且謂斯舉不可無所述乃白今巡撫都憲趙公文博因憲副胡君謐考績之來徵余爲記余方與館閣諸君論程邵之學因謂胡君曰邵子深探物理妙悟精契爽錙銖至於今雖田夫野老皆熟其名字專祀之百泉固無不可然余嘗反覆其遺言之妙其爲詩曰一陽初動處萬物未生時爲書曰一動一靜之間者天下之至妙至妙者與似未免指氣之初動茫昧未形者以爲理方之孔子曰一陰一陽之謂道程子曰在物爲理處物爲義盖有間矣書院之建欲使學者究極本源上泝堯舜以來相傳之正脈豈可以周程張朱數子未嘗至其地而不之祀也諸公之祠議始欲專而終不果意者或有在於此乎胡君浙水名士嘗提學山西有盛譽聞余言極以爲是余旣爲序其創建之始末歲月故并著此說於後使學者或有取焉以不昧於所從亦庶幾

書院講學之一助也

新創學宮記

車 璽

輝縣在衛輝府之西地形高阜泉源灑深爲衛地之勝概宏治戊申改元之春余始莅焉因嘆曰卓哉蘓門之奇眞可爲宋之李邵元之姚許諸賢講道之地哉越三日詣學則又見門巷庠阨闐雜揉生徒之就業者蓋鮮乎其有造也余又嘆曰古今人之不相及果若是哉縣城西郊百泉之左今浙中提學副使廣安吳原明成化間創百泉書院萃列羣士講肄余踵行之歲試士懷鄴諸路必至輝而留憩書院也再過學舍心殊惻然越歲河南左參政華容王公民望前守衛輝雅重學校余至衛言及辭未畢而公毅然肯爲因白於巡撫河南都御史海虞徐公檄行知縣臨邑李琮庀材鳩工以錢計之出公府凡六千募部民凡三百千有奇易市廛地東西廣十丈許鑿石於山爲柱爲礎伐木於林爲棟爲椽新立櫺星門三楹列兩廡十八楹齋號厨庫凡四十楹文廟講堂悉從舊制今年乙卯冬落成之曰予過而視之丹碧宮牆怡悅心目又嘆曰美哉學宮眞可埒蘓門百泉之勝哉琮乃率諸生欲予言以記余曰孟夫子教吾與爾曰夫義路也禮門也惟君子能由是路出入是門也爾曷求之中夜平旦也乎瑕瑜顛倒黑白竄易爲聲利好惡之逞其吾義乎其吾禮乎若有一焉浸漬於

中則荆楚吾路茅塞吾門矣必也充大乎陰陽五行之全體運行乎健順五常之恒性繫馬千駟取人一介截乎其取與也義何大乎禮儀三百威儀三千充乎其上

下也禮何尊乎昔之塞今之通欲之暗理之明同一機也爾多士出入於斯游息於斯尙其媿前哲之美以衍山川之秀氣爲國家之楨幹可也若徒炫耀目前之壯麗發揮道左之豐碑豈余之所望也哉琮筮仕始來約已愛民篤行教法積之以年風俗之厚人材之興可知其考最矣因記顛末以告後人

思賢亭記

車 璽

輝爲共城古邑深孔道阻蘓門而源泉澤沸眞幽僻佳

輝縣志

卷十五

藝文 記上

十八

境也晉孫登嵇康輩亦嘗嘯歌放達其中至宋邵康節先生從李之才講易今存安樂窩桃竹園故址然則康節學於輝也久矣元則姚雪齋先生許魯齊竇子聲諸公倡明理學許公至自河南竇公至自大名而雪齋家於輝輝盖代不乏賢也迨我皇明奄有四海大敷五教合天下而學校之教養之彝典大同而賢才穎出或不能皆同者何也如輝爲衛輝之一邑山川勝概民物阜衍他邑不及至於才能何獨讓焉予曰不然也今之士子同樂聖化同守彝典而或有不及者盖未之思耳故曰思則得之不思則不得也執經抱史固曰思矣無乃求其迹與紆朱拖紫固曰思矣無乃慕於利與不若約

之於不覩不聞之中以立其本審之於或義或利之介以達其用邵何人也內聖外王之道而幽明變化乃能默契許何人也篤志力行之學而孝悌忠信乃其根本苟得於此亦將接足乎前人而一藝之長短一秩之高下誠不足騰口頰也然予非獨爲輝士言也亦非爲觀美也因檄知縣李琮縣丞趙景庠生盧瑤構亭於書院以勗多士而名之曰思賢

重修百泉書院記

崔 銑

百泉之有書院自僉憲吳公伯通始也百泉出蘓門之麓古之辟地者多居之孫登以默邵子以易許氏以教姚氏竇氏以功吳公合而祀之吳公明朱學遂祀朱子

輝縣志

卷十五

藝文 記上

十九

而溯之自周子及其友南軒作齋與室以居諸生之來者後副使車公璽增祀先聖羣賢降而配食今閱四紀書院始廢正德庚辰知府翟君至以清嚴治衛事明作而民安乃大有慨於斯議修之御史見而謂之曰是不可緩也已參政僉事奉約也惟謹副使來試士又言之御史風裁奕奕參政僉事協政意在惜費字民獨於是役不吝也知府發帑贏財市材易甍檄下知輝縣李傑肇事推官楊惠來責工知府又作樓三楹於思賢亭後樹表廣塗復地之隱於豪右者六十畝房六間以旣廩諸生焉於戲是役也可繹也夫昔宏治中士尙文畏義有司重學文章炳然可誦述矣正德初卽遭劉瑾之虐

威劫賄成士氣索索已而薊盜中橫邊虜川寇數年並發當是時仕者齷齷自守以待代否卽薙民獵金以幸遷官學暫毀公廩不續學官奉空腹而卧土或易衣而行野多退士而悲憤憂楚之辭作故宗藩起變舊臣逸人不恥黨逆寧以廝養彬以武弁親侍帷幄以天下爲貨而市之且弋之何則人忘學而惟見利故也今大君作矣盡去其舊而新是圖舍士則無所於藉也然而聖人之不生也久矣莫之折衷故人肆其言夫古可學也而滯於迹今可通也而流於簡下學或拘於淺徑而上達者或蕩檢踰閑故詞繁而經晦循名而實亡異端不起於是乎孟子曰萬物皆備於我矣含而潛之者仁也

輝縣志

卷十五

藝文記上

二十

裁而宜之者義也又烏有四者之失乎御史汪公名淵參政陶氏名照副使王氏名韋僉事翟氏名瓚曰鵬者知府也是役也吾聞諸金教諭廷貴云明年改元曰嘉靖也

創修姚公祠堂記

徐文溥

公祠輝舊矣而蘓門今始也嘉靖改元之春余與憲使張君天性巡河北登百泉謁公於祔饗之廟而去越六月再至公有孫曰泰持家集謁余願新公祠且曰縣西府館寔故雪齋二石獸者故物也今大中丞劉公令茲土爲葺我先人祠宇是謀會遷去未果題碑陰大意謂植民生倡斯道爲公之大者余於是謀諸張曰先嘗用

言者祠公茲乃弗祠非曠禮乎 祔饗十賢而未有專祠豈所以示崇奉表勵之意耶夫祠旣屬公弗可奪也而歲褻民儉弗可舉也如何張曰盍以里中淫祠之不在祀典者改爲余曰善乃命縣丞詹煇稽之得俗名三官廟者於蕪門公故里也廟不知創建之始屋三楹門一楹繚以土垣介在路隅丞曰時爲淫祠祀典弗載淫祀無福先王所禁改而新之公私無費不亦可乎且值於茲豈神有以相之乎於是余乃易以今扁示專也值太守翟君鵬督縣舉事速厥成也量費以像公卜曰以奠位致虔也牒於姚氏子孫世守奉祀謀其永也祠成太守曰此舉也其有合於禮乎請勒諸石志始也

輝縣志

卷十五

藝文 記上

二十一

馬公德政碑畧

毛麟之

高陵馬子宰輝縣甫期月譽聲四達余聞之而未識其人也未幾輝生員戈尙志民胡子春來曰我馬侯德在我民我民德之弗忘祈一言壽諸石以永我民之私余曰宰之道五曰仁以及物曰誠以感神曰義以創制曰公以立法曰果以祛患侯有之乎戈子曰教養道廢魚肉我秦越我侯有推心之愛旱魃爲災薰灼我憂勞我侯有祈禱之應城隍未就督責我頻仍我侯有浚築之功疆界未正兼并我吞噬我侯有均田之法渚水肆毒蕩覆我割據我侯有蠲稅之舉若侯非惟德我民且及我子孫後世矣余聞之曰嘻茲固足以驗侯之政矣昔

子產爲政民患之若不勝其 及其終也愛戴弗已且以播之金石焉故夫子數其事而稱之今侯之政若此非曰可以雄當世雖僑也何以加諸侯可紀甚多此蓋鳴其一而繫東人愛日之誠也

馬家橋上閘記

李 濂

嘉靖乙巳余西遊旋憩共城聞有歌於其野者曰衛水滔滔奔流如駛下至雲門逾十九里開渠一丈其清泚泚澤我杭稻三農欣喜又歌曰百泉混混共城之下水鳴石間不舍晝夜我侯惠民引流滋稼咸飽而嬉樂茲穠稔復有和之者曰共城之西卓水澤沸鑿渠引之以灌以溉宜我稻田厥利罔旣嘉名永垂惠而不費余聞

輝縣志

卷十五 藝文 記上

二十二

而異之召父老而問曰胡爲有是歌也父老曰此邑令郭侯之善政也吾邑西南三里有村曰稻田所相傳昔人種稻之處國朝以前已有之矣自衛源而下猶有分渠遺跡隱隱可見綠山水衝淤埜畛湮沒荒穢沮洳不復可田以致賦稅莫辦居民轉徙輝人甚苦之我侯首興水利以蘓困窮乃相度源隰至所謂稻田所奮然曰是非昔人種稻處耶吾引泉以溉之民食可足也亟白其事於諸上官僉以爲然侯蠲吉興工計畝召夫刻期畢役上有衛源建立閘口下至雲門約有十九里開渠濶丈許深半之川流沛然莫之能禦而渠之兩旁令民皆種稻吾民百世之利寧有窮耶此所以歌謳在塗而

弗能自已也李子曰嗟呼天地有遺利則生民阻飢矣郡邑得良牧則養民有道矣昔史起爲鄴令遂引彰水溉鄴以富魏之河內民歌之曰鄴有賢令兮爲史公決漳水兮灌鄴旁終古烏鹵兮生稻粱余猶以爲異世未之覩見也乃今躬覩郭侯之政而民歌之足以與鄴令史起之事並傳於後世無疑已使列邑皆得若人而爲之牧則民瘼其有瘳哉

改建劉公祠堂記

高 崧

公留像於輝舊矣而祠於縣治內使百姓有所瞻依在位有所矜式則自今始也公諱玉字咸栗號執齋江西萬安人由名進士宏治十二年尹輝在輝五載治行爲

輝縣志

卷十五 藝文 記上

二十三

河南第一擢監察御史陞提學僉事歷大理少卿都察院副都至刑部侍郎以大獄歸有執齋奏議行於世公之學問文章卓然名世載於邑誌者甚詳心事如青天白日表裏洞然無纖芥可疑輝父老人人能言之而愛民一念發於至誠尤非人所易及也在輝善政不可殫述而其大者則興學校重節義以愛養民力爲己任奏免沙堞社沙壓地糧八百餘石永除定額此其章章最著者惟其德澤入於人者深故於今五十餘年輝人愛戴而思慕之猶如一日焉其所謂有斐君子民之不能忘者歟崧來令是邑才菲政拙庶務茫然方欲景仰前修以補不逮一夕夢公召予自通姓氏若訓誨之者予

駭且疑焉明日訪於輝民得公祠於東關淫祠之後遺像雖存棟宇走鳥鼠岑寂殊甚崙大不安乃諏日命工移公祠於輝治之右設原像其中以祀之順民心重名宦立表儀也嗚呼輝人所以愈久而愈思乎公與公之所以致民之思者諒必有道矣凡我有位撫公遺民其亦繹思也哉

百泉種樹記

翁大立

嘉靖己酉初夏予校士至百泉環泉皆古木也少倦卽憩息焉予性喜種蒔而視土又宜木於是命侯吏移梧桐二十餘本竹數本植之書院前檜柏椿楊榆棟桃杏榴棗諸木視隙地卽植之旬日而去踰年十一月予復

輝縣志

卷十五

藝文 記上

二十四

來校士顧前所植竹木蔚然茂矣迺召諸生語之曰昔陽貨問樹人於孔子孔子曰樹桃李者夏得其蔭樹蒺藜者秋得其棘孟子曰舍其梧櫟養其楓棘則爲賤場師焉諸生予所樹也將爲桃李耶梧櫟耶予何樹木易樹人難也因書以示警云

重修學廟記

蔡國熙

輝縣爲中州名邑蕪門百泉之盛聞於天下不肖熙神遊其地有年矣隆慶己巳家大人司訓茲庠不肖以解組歸田時來省親臨流陟巘深慰夙懷一日庠生校友先儒仲叔關友可守周友崇儒揖余言曰吾輝學之建遠莫可考歲久頽圯嘉靖丁巳藩參陰公分守茲土顧

瞻學宮慨然嘆曰其責在我考發羨帑鳩工飭材邑令李公祇相厥役易腐爲良飾陋爲華閱五月而告成殿廡門垣靡不完好大成門之外爲泮池橋與欄皆以石爲之兩旁手植柏樹十餘株諸生歲時饋奠朝夕遊歌於茲者心快目爽相慶爲曠世之遇迄今十餘年尙缺記述吾輩所謂日夜歉然者也願借數言追書嘉績且有以教吾黨之士余以不文辭家大人復有嚴命敢不恣恣言之竊謂天下之事未有不廢於因仍依違而成於鼓舞振作者其鼓舞振作之機又必因觀感激發而後克樹無論微巨皆然而况學之所關尤爲至重者乎噫輝學之壞於昔者不知幾閱歲矣藩臬之使莅輝者

輝縣志

卷十五

藝文 記上

二十五

不知幾更大夫矣未聞有惻然者乃陰公則若不能一曰安焉藩司尊矣猶有巡察之使糾繩於上程能於簿書筐篋之間以應文追責亦仕者常局也公則不屑此而以興學造士爲急務非破因仍依違之習而毅然以振斯文爲己任者能之乎宜多士之德公思報不能湮沒其懿美也然竊思之多士之所以報公者果如斯已乎夫吾人以藐然之身中處宇宙有聲色臭味安佚之性有喜怒哀樂之情有君臣父子夫婦長幼朋友之倫性必節情必平倫必敦而後可以爲人否則生理日鑿亦與跛行喙息者等耳然非先立其本而徒矯制於感發之時譬諸鑿堤捍江河之溢爲力雖勞而未必有益

此在學者自修自悟難言也難言也孔門立教惓惓以修德講學爲務其所修者修此焉耳其所學者學此焉耳慨自聖教不明章縫之士所謂學者不越訓詁詞章之末以爲阿世取榮之資修德之功罕能有事縱支離之欲以渝性任好惡之私以蕩情長浮薄之行以敦倫踵踵爲然間有質性近醇者亦不免因仍於聞見之舊依違於利善之間而卓然自立者之爲難也此海內士人之通弊在輝或未能獨異者多士試一省焉果能體監司作人之盛心奮心於學以期上達乎抑止於樂泮宮芹藻之美優游其間坐消歲月已乎其所謂學者果能卽舉業之文而反躬體驗求以節吾性平吾情敦吾

倫有益於身心日用已乎抑亦沉溺於詞章訓詁爲富貴利達之媒乎意念起於幾微而賢不肖之分懸若霄壤是在多士自審焉耳且多士感公之德必欲標著以垂無窮意不爲不勤矣然旣歷一紀而未能竟求諸人也若修學之後士皆奮志聖賢之學操習涵濡於十年之久必有造道之賢處爲名儒出爲名士所以報公者更爲宏遠其機在我又易易耳翼翼共城固山川靈秀之鍾往哲藏修之地也敢謂今日詎無若而人者邁迹於其間哉諸友聞之竦然有省因撰次爲記祇復家大人之命兼發多士志學之端若闡明正學終日提撕則有洞石劉公澗村史公與家大人東林公之教存焉渺

未小子又何知哉陰公諱標號豫菴保定之容城人丁未進士德政猶存耳目修學其大者李君諱愚號果菴臨汾人捐鍰助役勞勩居多董役者爲縣丞徐循而教諭李君載贄訓導張君延祿宜併書之

張家灣閘記

李容莊

邑治西偏跨山之陽地勢建瓴恒多水患盖自雲門上一帶瀕河近壤沮洳卑濕被患尤甚雨澇淹沒歲比不登民甚苦之嘉靖二十九年分守貴陽敖公始於沿河諸要口創建石閘數道引水決渠以資灌溉而張家灣其一也歲月浸久湍水決齧故閘日就傾圯萬厯改元邑侯張公縮章茲士負宏敏練達之才敷優游愷悌之

輝縣志

卷十五 藝文 記上

二十七

德服政末期百務振舉適見閘口崩壞有妨農業慨然以興廢補敝爲心卽召管河舊役分總庶工酌費鳩材卜期興事未兩月而績用告成其有成於吾民也甚大雖信臣之在南陽史起之歌鄴內方之於今殆無遠過矣公諱一通字汝達號洙濱登乙未進士直隸寧津人重修

啟聖祠記

李肅

啟聖祠舊制也自先代以及我朝酬功報德之地盖木本水源意也肅自丙辰承乏於茲初入橋門見其臺殿巍峩嗣入講堂又見其棟宇壯麗詢之曰此二三直指與督學使者歲時釋菜所嘗閱也由堂而後則 啟聖

祠突見牆垣剝落屋瓦飄搖幾委神於草莽肅異何前
後判若兩地或緣上官耳目所不逮耶嗟嗟吾之事聖
賢以心耶以迹耶如以迹粉飾文具足已如以心則崇
當祀者之身不若崇當祀者之心崇當祀者之心又不
若推當祀者所欲祀之心譬富貴家大庭廣廈必不忍
令其父繩樞甕牖况大聖賢乎肅固輾轉未安奈綿力
何今歲春少尹譚公慨然以重修爲己任鳩工庀材鼎
新革故凡一切土木瓦石米鹽色料悉辦於囊橐之俸
餘且時以身董其事甫匝月而煥然一新入其域者迥
不知爲昔之 啟聖祠矣公嘗云我輩竊聖賢餘唾享
天厨祿有年矣今復藉鷓鴣一枝棲官云卑是我負聖
賢也惟是以中州三年之績酬余東海歷年之費卽以
謝余不肖不能廣聖賢之教徒冰兢於此位者也實未
敢有負聖賢也不能事

夫子之門牆而仰體 夫子所欲祀茲役也推其心以盡余
心耳非觀美也非邀譽也或於木本水源處得本本源源
乎肅味公言而嘆曰惟誠足以感神惟清足以孚民公
無取於民而以之奉神神有不妥乎公有恩於民而以
之使民民有不悅乎且敬所尊愛所親於周公成文武
之德觀之洵善事吾 夫子哉公諱曾傳字省吾以明
經起家山東之萊陽人時萬曆戊午伏初庚之日

創改新河記

趙彥復

輝故有百泉卽卽風泉水在治乾隅實毓龍脈汪洋澎湃直走而南流水無情與民無涉先正霍敖兩公相其地勢疊建五閘以滋秔稻此於畝畝則得矣然龍飛砂走無包羅含蓄之益又與縣治無涉先令如金谿聶公江夏段公鄉達如廩延冢宰李公邑人夏部王公相其地勢僉欲改濬環治以補風脈之偏無奈道旁築舍祇托空言嗟夫非畚鍤之難舉則亦仔肩之難邁也邑侯海虞陳公以丁未來牧茲土不期月龐洪之澤已潤九里卽欲動大衆尙未可與更始再逾年刑清政簡予民以暇日家豐戶羨寬民以餘力是可以興不得已之役矣會屯臺使者前後左公張公水利正職掌按部皆親

輝縣志

卷十五

藝文記上

二十九

歷其處擘畫得宜檄下決幾舉事無再緩侯慨然曰天與輝人以靈秀而人自棄之可惜也人望有司以率作而乃自以委之可悼也濬河均利環渠補偏夫非今之急務哉西北之水以均之東南惠至溥也無損於農業而有裨於士民利至大也稍勞於一時而永逸於後世澤至長也於是彙鄉紳王君一龍茂才郭君可久詢謀僉同履畝相勢上自張家橋開濬經治南逶迤而東至巽地旋折而西南入胡家橋故道上下連延約三里許廣二丈深亦如之計其土方若干畝各償其值貰其租卜吉興造而工程頗浩役眾頗夥侯方蒿目憂之而子來之役殆不約而輻輳也出之紳衿士民之義施耆什

之五出之訟獄之輸力免杖者什之三而侯之出俸金以招募饑民之以力易食者亦什之二不三閱月滔滔東逝絡繹迴環非洋洋一大觀哉以滋庠斗則河潤也以受行潦則尾閭也以禦寇盜則金湯也以壯形勢則帶礪也以毓靈秀則來龍也以故挽外洩之氣添文峯之秀一時科第蟬聯人文鵲起文科如王遵道呂休連鑣雲路武科如郭蕃寔破天荒選元如曹鑑輝人也固也至如郡庠楊彪新庠李化秀亦輝人也歲薦如郭雍穆亦輝人也固也至如郡庠馬務實汲庠張守義亦輝人也異哉彈凡之地而文風炳蔚師濟踰躡不發於往時而驟於今日非河之異而奚異哉轉睫於甲子科名

輝縣志

卷十五 藝文 記上

三十

又未可量也不寧惟是侯勤政五年凡有用之水無不挑濬委官給穀責其成功如晉祠卓水鄧家寨焦泉峪河等各長廣丈尺不同而濬澤之溥惠則亦侯之功當與隨刊平成者媿隆矣嗣美政者械林王侯以時障決而新渠之澤可保不涸噫嘻濬澤者陳宏澤者王後先濟美流澤萬世輝民何以得此兩侯哉是役肇於庚申之冬竣於明年之春而記於天啟之第三年陳侯諱必謙號益吾姑蘓之常熟人癸丑進士今擢江西道監察御史王侯諱廷諫號蓮井關中之華陽人台衡之擢將未艾也

重修輝縣城隍廟碑記

張克儉

朝歌郡西五十里爲輝縣太行犄之百泉滙焉山截而翠排空水漣漪而虹繞地異彩奇光奕奕飛動靈運詩所謂山水有清暉者也余以辛未釋褐來尹是邑公署右不數武爲城隍廟瓊軒豁敞碧殿淵閎巋然巨觀歲時祈報咸有事於斯廟雖規模具備然丹雘凋蝕而謝光金粉塵封而減耀鐘鼓無聲坳垢弗汎昭事潔清之謂何而廢墜若是亟擬鼎之以初受事弗果越明年壬申九月流寇奔突河朔清化修武相繼淪陷余乃九合士民 蒐精銳歃血中誓曰有不與共人精白乃心以守土者惟神之罰儻邀福於神藩垣無恙士女牧寧惟神之休敬新斯廟以奮神貺眾曰諾踴躍登陴氣鼓

輝縣志

卷十五

藝文 記上

三十一

志堅丁壯沉毅而弗讐旄倪靜恬而不譁揚旂擁盾仗鉞揮戈放泉流以成鴻浸塞徑竇以杜針芒屯芻粟以預軍需嚴邏緝以却奸細賊知有備尋遯去是豈人力所能爲哉神實相之云爾癸酉三月流寇復大舉颺至腥風妖火匝地連天且洊逼郊關矣余偕輝人宵旦防禦歷夏徂冬不遑寧處甲戌賊渡河城屹然如故乃屬其耆老而告之曰輝以彈丸黑子密邇山右賊眈眈虎視思以蠶食卒鞏固以有今日誓詞孔赫神實聽之其誨吉鳩工聿新廟貌余首捐贖鍰百金用倡懿舉輝人士藉神之勳釀金弗悵爰命肖像之工飭神容以嚴雅設色之工繪棟宇以文章鳧氏莖鐘鞀人建鼓正殿胸

霞而晃日寢閣駐月而藜烟楹廡林立而雲披扉牖洞
開而星爛以逮黃冠焚誦之壇羽流步虛之地罔不庀
葺巍峩莊嚴偉麗歲計之功成於不日翹者仰璇題而
色飛裸者俯瑤墀而神愉工既竣采石蘓門用記厥事
乃再進共人而告之曰茲役也暉廊階以袞繡煥棗稅
以丹黃豈其營不急之務以侈觀美哉先王立廟於渙
聖人設教於觀所以竦聚萬靈齊一函夏也方今銅馬
郊嘶赤眉雲擾蚩蚩之氓心志恍惚惟鎮以神眾乃大
定儻神棲崩泐弛而不治何以生民之共而攝其貳貳
則渙渙則不可收拾而疆域危寧俟神降之罰耶惟廟
貌新則人思敬敬則清明湛一之念生子孝臣忠夫貞

輝縣志

卷十五

藝文 記上

三十二

婦烈有臨入廟時勃然興起者百姓恒持是念人人爲
張睢陽爲顏常山爲岳忠武矣蕞爾山城金墉鐵壁疇
能伺其瑕璽而螫之卽謂聖天子萬里河山從百姓敬
心內泰山而四維之可也不然謬云福不可徼神不必
媚媠神之吏何有於民媠神之民何有於吏官方壞民
俗偷天下事決裂不可爲矣余之爲是亟亟也豈其營
不急之務以侈觀美哉君子有以諒我矣銘曰凡伯之
國衛子之宮澂江滄滄復嶺龍從阡陌井廬星攢繡錯
有闕璇宮崇竝寥廓繫惟神居爲民之庇咨我共人于
鼎于賁爰謀山藻忽沸鯨波潢池盜弄門歎河蒸蒸
髦士乃怖乃栗徼靈於神眾志乃一旗鼓堂堂泉流泱

決蠹茲小醜乃竄乃亡竄而復逞剽悍焱疾受神之佑
我城孔吉乃董匠氏乃釀金錢黼黻丹碧銀榜瓊簷輪
奐旣美蘋藻亦新迪我共人各敬爾身吏樸民淳男耕
女織不伎不求無反無側清明湛一神乃降康絲天澄
霽魃隱螽藏時和年豐載歌載舞天子萬年永綏共土

姚書林
採訪

創修東面石城記

呂休
裴平淮

城一也記城修者東南西北各有勒焉所以美我碩人
興歌讚嘆並示重於來茲以見開闢來爲吾輝永不可
緩之盛事云初輝之突遭寇變也城一頽然敗壁耳於
斯時也闔邑震恐人萬分旦夕莫支獨賴吾邑侯張公

輝縣志

卷十五 藝文 記上

三十三

日夜戒備補墜修崩簡閱訓練使僻域孤城獲蒙其安
全者厥功茂哉迨寇氛南渡而人多幾倖於目前乙亥
秋寇自關中復潰入鞏雒而河北大懼公慨然曰天下
事急則治標緩則治本况天限南北賊未易能飛渡而
我宜速備因謀之共人士以創修石城爲己任焉議出
塊磚片石百無一湊以及灰木之費工役之繁復缺如
也人不勝嘖嘖焉難之公曰天下事當從難處做起一
畏其難則更無可爲之事矣於是毅然斷之其議遂決
先所議費猶今工之半也迨役興而費浮於議者倍人
見費益多則益難公知人益難則益銳先得所捐俸三
百兩再得紳士義民所折夫助石七千一百一十六丈

磚一十六萬五千八百有奇既又得所多方設處石三千三百五十四丈磚二十三萬六千四百有奇因越境募匠作子來趨庶民日數視之勤父之督家不逮也人勞慰之慈母之愛嬰不若也而吾輝乃欣欣有樂成之盼矣然其物用之充則南北城爲先西城次之若東城其所先難焉者故始自去歲秋杪迄於今歲春盡歷七月餘而城事方告竣昔之傾側陂卧者今則峻壁陡絕矣昔之剝墜穿阼者今則鐵壘鞏固矣昔之摧陴弱立者今則列障雄峙矣公不惜以一身之難而遺千萬人千萬世之易真有見於時之當爲已之能爲有緩頰俟之而不得者公嘗曰吾聽政四載而外其相與於輝人

輝縣志

卷十五

藝文記上

三十四

爲不淺輝之人皆吾赤子輝人之子若孫皆吾赤子之子若孫也吾祇惟賴於目前而已則視輝爲傳舍吾爲輝之子若孫計非業足善後功可垂遠惡在其能及乎倘城修獲完吾庶可以有庇於輝人也已繇是觀之輝之城成於物力而要非成於物力也皆公之精神心力所聚結而成輝人之徼公福享於及身而非第享於及身也皆後世之子子孫孫所安逸而享者也則公之爲造於吾輝竟何如哉謂之永不可諼亶夫張公諱克儉字禹型晉之上黨人登辛未進士輝人感其德咸思壽石以誌不朽引紀旣詳而因爲次畧如此崇禎九年歲次丙子孟秋日

創建西面石城記

曹鑑

輝舊爲共伯之國漢始置輝唐改爲共州金爲輝州及我朝仍爲輝相傳不知幾千載沿革靡常拓縮無定皆築土爲城夫城以土故修補無寧歲其先代不可攷景泰二年正德十二年嘉靖三年節有修築止塗飾一時原未嘗有磚石之固故終不得爲永久之圖也况輝爲秦晉門戶衛趙咽喉綠林嘯聚時時告警豈尋常城郭比哉辛未秋余不佞待罪金容而輝侯張父母有年譜誼以初筮輝邑過而訪焉篝燈促膝橫談民社計碩畫鑿鑿雅如宿吏首言修建石城躬毅然任若皆不能旦夕待者下車之明年已卜吉告舉亡何流寇震隣旋薄

輝縣志

卷十五

藝文記上

三十五

城下人心洶洶不遑議畚鍤矣侯擐甲登陴卻寇者數四爾時先其急務練鄉兵修雉堞挑品坑造火器繕兵刃築關牆濬海濠設柵欄種種防禦種種苦心詳之裴孝廉南城記中而輝已屹樹金湯矣以故壬癸兩歲流寇頻犯而輝土無恙雖人和之裕哉而地利之力不可誣也迨甲乙之歲寇氛漸遠流移漸復曩者修城之願警動於中侯曰時可以乘矣工可以興矣於是謀諸父老極力舉行先發俸金若干兩爲諸紳衿子民之倡鳩工庀材材估如民間之值版築取諸里之甕夫其發帑之不繼者佐以犯科者之贖鍰素封者之義助而省工視效日每三督焉眠食不遑勞勩不惜此惟子視民故

家視事一腔苦心可格豚魚况百姓有覩面目誰不感先勞無倦而竭此勛力也者子來之役不曰告成不難立致矣百雉崔巋烽候相望屹然河朔保障余不佞嘗憶春秋書城中邱譏非時也史稱城雒陽城大梁議其示人以弱余謂不然孔子繫易不云乎王公設險以守國又云重門擊柝以待暴客盖取諸豫夫以大聖人當取卦尙象時豈有暴客之足慮而重門擊柝所以防患戒不虞者固周且遠也故需有衣袽否著苞桑城之不可已也如是况今爲逼門庭防禦顧可緩與城周圍四里四十八步舊制高二丈四尺廣一丈今增高四尺廣倍之敵臺舖舍炮眼女牆煥然改觀矣然磚石錯用西

一面延袤二百五十丈約用石一萬丈磚四十二萬塊灰四十萬觔木植麻縷工匠米食不下三百金約可用二千三百金有奇四面約用九千餘金出諸義助贖緩者纔什之七而餘俱侯捐五年之俸以足之覈吏於今求其不遽廬其官而傳舍其政者亦千伯什一矣曾子視其民家視其事出囊金以鞏千萬世不拔之基創開闢來未有之績哉侯之心可以昭天下告後世而曩者金容之夜橫談之言至今踐之矣顧城者成也亦盛也成則貴完全盛則貴包括茲胡獨爲西面記然四面各有記盖以四面各有分督之人余不佞責屬西壁故止記西城然西城對行山通盜藪爲羣寇必繇之地視

三城尤爲吃緊且與百泉相面烟嵐掩映泉水潏迴杭稔滿架竹蒲環繞登其樓遠瞰山靈近吞水秀又若與三城迴別者侯故題其門曰覽勝盖以壯風角之觀不徒樹藩垣之險矣侯令輝五載課士養民修廢舉墜稷稷善政罄竹靡盡是光昭令德以輯和人民隱然無形之城固有裕於金湯之先者矣茲益峻而隄防嚴而扃鑰則險與德備闔境士民家安枕而人衽席受侯之賜不旣多乎是役也肇於崇禎乙亥之秋杪而竣於明年之春暮盛德大業將益峙不朽矣侯諱克儉字禹型號鏡龕辛未進士三晉之上黨人

新建南面石城記

裴平蔡

輝縣志

卷十五

藝文 記上

三十七

歲次乙亥冬十二月之望日南面石城監工告竣是役也於季秋朔日始基焉爾時磚石木灰與夫羣工各役百凡未就一朝而講大事識者猶難之而邑侯張公曰易易也在力行何如耳於是三方指授招集匠石不數日而事事就理先括餘石以不疑其所行隨捐俸金以爲士民者倡多方節省嘔盡心血除士民助外輸金一千二百兩有奇且每日三閱城工簿書之外雖殘夜必躬履焉古之君子鞠躬盡瘁者豈有讓哉猶記壬申九月蹂躪之初承平旣久一旦風鶴告警政盤錯之所以別利器也侯抱病決策巡四城擇兵振旅躬秉武節立講武臺親誓心焉簡精銳五百騎北歷侯兆川自翹

嶺西出天橋涉太行之巔登紫霄關練鄉勇萬二千餘
旌旗蔽日威鎮寇氛將相之才雖韓范不足多也已而
濬海濠鑿品坑斬古城設柵欄造火器修城堡查訪奸
細厲兵秣馬牖戶亦綢繆哉何期癸酉三月捲土重來
天未厭賊我兵不利侯親歷城頭身列行伍與士卒同
甘苦焉羽書旁午援兵索餉紛然其擾也士民猶代爲
假寐而侯十晝夜目不交睫百倍精神眞未易及也哉
自是流寇無月不犯甚至一月再犯以至三犯赤子何
辜塗此肝腦最可危者七月之師不利東北黃昏風烈
賊火突發先張於北次熾於南而城守士民方動色深
憂以爲賊必有薄我城下者而是日督撫之師拔自湯
陰一日之餘幾行三百里救我共城出意料所不及此
一時也賊火旁發督師闖關兵耶寇耶眞耶假耶危急
存亡之秋所謂一髮千鈞者非耶士民疑甚亦恐甚侯
曰凡人所惜者生耳我所全者城也開關審視我身宜
先果撫則輝之福也不爾遇賊當以全城爲重矢石交
加切勿顧我噫當時出此一言士民皆相對失聲孰意
天遣督撫人心稍定繇今思之報國忠心眞可對天地
泣鬼神輝人士已戴德於無疆矣幸而季冬之初冰堅
可渡賊首南奔侯睹此斷首刺心之民何減傷心之痛
獨計斗大共城兵火殆盡亦已難矣而兵馬錢糧各項
給公猶足支持非有補天權變之才曷克濟此雖

未下而土賊時時竊發亦時時窺伺侯曰我有以永奠輝矣地利之說自古稱焉築斯城也與民守之況有人和之足貴乎爲之力撼山嶽飛成天險黎民不懼水土不寒天意人情侯兩收之矣今南面功成三方亦次第就舉其制度高三丈闊一丈五尺磚右相兼樓臺錯立炮孔星布實戰守之長策也五里孤城陡成金湯之勝不獨名甲中原且北可爲燕趙之鎖鑰西可爲秦晉之咽喉東南可爲齊梁之藩屏居中可爲輝人士世世子孫之一塊衽席土也侯非無龔黃之政事歐蘓之文章嘖嘖在人耳目間蔡等所醉心者特以干戈鼎沸萬難措置中竟於吾輝建此祖宗開基來未有之功績亦吾

輝縣志

卷十五

藝文記上

三十九

輝天地開闢來未有之奇績也厥功盛哉侯晉長治人辛未進士出身諱克儉字禹型時人目爲中興之佐云崇禎九年歲次丙子春日

創建北面石城記

郭益善

北爲坎地萬物所歸造化生育之原本於斯宅焉故天樞奠垣於此而衆星拱之我國家定鼎幽燕位正居坎負陰抱陽南面而聽天下建聖子神孫萬年不拔之鴻基則形勢得所歸耳輝古凡地衛世子共伯居焉其脈自邑北九峯來雖不敢與天下大形勢較然在輝言輝則北面亦一邑所歸而成始成終之元本也邑侯張公創建石城東南西三面備極經營其在北城尤愜愜注

意盖作事者精神物力相賴以有成而朝氣旺暮氣衰
困頭饒困底乏迨其末路往往苦神力之弗繼焉公慮
此甚熟乃進家嚴暨二三碩茂詳悉籌度曰北城爲邑
堂奧東西其肘翼南其門戶也肘翼與門戶備而堂奧
弗崇何以矗大觀示景仰乎故北城之物力較三城宜
豐繕北城之精神較三城宜奮庶可免努末之誚家嚴
受命唯謹公乃以新鄉孟諸郭先生所助磚石悉以畀
北面而捐俸設處較三城尤亟於是物力饒矣乃拆工
爲四工有長長有副副各有執事自正月朔八日起工
迄三月之望而工竣城眎三面崇三尺濶四尺樓櫓臺
舖增飾有加總之成功較各城倍速倍峻而用物較各

輝縣志

卷十五

藝文記上

四十

城甚多落成又有文記之余不佞弱而善病難於搦管
然不敢令代斲懇缺畧不詳且失真也乃齋沐靜憩詳
述我公敬終如始之實併誌歲月以告來者公諱克儉
字禹型辛未進士山西長治縣人家嚴諱用之字從先
至於練兵剿寇憂旱恤民五載恩波父老有心碑在又
何俟余之詹詹崇禎九年歲在丙子仲秋吉旦

創建北關碑記

郭澆

輝城之北五里卽山也蒼崖翠壁望之如烟無北門城
之北遂無關市也歲壬申至癸酉晉寇踰嶺而南戾於
輝輝城之北山之下郊原曠衍皆可爲馳馬之場也而
所望蒼崖翠壁者寇騎羅列焉望之如蟻潞安禹型張

公登陴固守嚴訓練謹盤詰鑿池築城厲兵秣馬凡爲
守禦計者無處不慮矣復慮城之北旣可爲馳馬之場
則馬馳卽薄城下矣於是下令曰日中之市宣集諸此
百姓有願誅茅闢宇者聽焉令下而百姓爭趨之公爲
東西設柵欄二城之外舊城依然又於高阜之處設墩
臺三一切夫里之役盡爲除免也而百姓益趨之期年
之後廛聯屋比矣於是百姓喜曰公之便我如是乎公
亦喜曰城與寇馬今始隔矣而余於是慨然嘆也三四
十年前士大夫心勞而政益舉今三四十年來士大夫
心勞而政益弛在前心之所勞者營其職也在今心之
所勞者不在其職也士大夫爭習爲涉世之術工矣乎

輝縣志

卷十五

藝文記上

四十一

高下淺深之際揣摩斟酌卽足竭其人之聰明而修職
無與焉則政之弛也有不日益甚者乎張公之營其職
也凡人思之所到者皆爲營之思之所不到者亦爲營
之此意於天下豈可多得歟精力過人天原與以作事
之具而公勉勉益營其職從此職愈大業愈隆鼎鐘之
上與先正比烈可也余待之

張公德政碑記

郭澆

鏡龕張父母之治輝也不忍遽廬其官而朝暮其政禦
寇安民興學造土建城練兵事事期計永久爲慈父爲
神君爲師中丈人咸的的在人耳目際不可誣也故聲
施茂美烜赫濯當秦氛旁午不獨室壁之墟倚爲金

天保障卽汴鄭成臯間野夫遊女羈士旅客皆知爲河
北長城潞國主亦錫璽書褒美稱其功與行山峻而衛
水長分守河北袁公以獲嘉守禦失宜借重代爲經畫
口碑實錄藉甚一時蓋我朝三百年來宰輝者未之獲
見也輝與敝邑壤相接雷封河潤沐煥說澤暉之力居
多每相偕問道百門山水覺玉森金晶松篆竹敵如晤
琴堂揮塵而話黍苗之膏繪樵薪之雅何至今汀烟墮
靄河陽錦色依然泉唱鷗吟單父琴聲如在咄侯乃以
憂去輝耶卧轍擁鑣莫挽純孝至性雖然侯去輝矣而
合輝之官族士民初不忍一刻去侯也相率祠侯於泉
源之左寫真其中又相率述其德政甚悉曰輝至今事

輝縣志

卷十五

藝文記上

四十二

充矣政重矣百凡料理惟艱而又加之時事多端兵荒
逕湊自非碩德嘉猷如韓文襄王新建其人能勝其任
而愉快哉乃侯甫下車卽減火耗刊木隸消編繇以恤
貧民周書曰丕平富不務咎底至齊信侯有焉剪豪吏
懲衙蠹禁賭博逐流娼以厚風俗叔向日閑之以義奉
之以仁聳之以行斷之以剛侯有焉六惜存心八則訓
士二社立會三條課文以成就後學戴記曰崇四術立
四教順詩書禮樂以造士侯有焉斯尙其處常也洎癸
酉之變寇薄城下飛燐煤血隼伺高墉乃貫甲從戎晝
扞夜擲斗大土城卒恃以不爲修武之續此豈書生事
耶易曰震來虩虩笑言啞啞震驚百里不喪七鬯侯有

焉寇往兵來犒牛酒索金錢輸菽芡供糗糒湯營左營
鄧營周營紛紛日不暇給費累鉅萬取之上無鄭綮錢
取之下無卜式粟乃懇懇申請上臺別郡接濟始不大
擾輝民而軍資亦足詩曰屢顧爾僕不輸爾載終踰絕
險侯有焉更足感人悲痛者方寇環城外元撫冒險宵
臨破柵叩關時夜已將分變起倉卒人心洶洶莫能察
其真僞侯獨慷慨出迎回囑擲門者曰速閉門無顧我
萬一事不測爾等當以朝廷城池爲重嗚呼此何等肝
胆耶石人下淚况輝民乎哉武議篇曰受命之日忘其
家張軍宿野忘其親援枹而鼓忘其身侯有焉迨寇退
卽鼎建石城高能峻而不坡麗能堅而不泐且胸有完

輝縣志

卷十五

藝文記上

四十三

城弗違子西之素麟筆所載城邢城周皆美其奠危爲
安也侯有焉又不徒一日之苞桑而億萬年式憑之矣
高閭五美未足悉也故民受其賜到今鷄犬靜音遺子
無恙芸香墨霧彬彬俗化文翁柘影杭雲靄靄家傳召
父宜輝之尸祝無窮也就輝往事論天厯中寇擾臨郡
百姓無端驚惶時輝守杜公止能鎮之以靜民尙祠之
不忘况侯以一年之中寇逼十六次而血戰保無虞者
乎其視祠杜公何如耶侯山西長治縣人諱克儉字禹
型鏡龕其號也登辛未進士豐才博學愛賢俊廣知交
議論滾滾不窮韎韐稍暇遂與諸名雋爲百泉倡和鼓
吹斯文艱單諸君子莫不聞風負笈執經趨絳化雨沾

花匪唯璧水六邑已也文章德政又合而爲一百里遺
愛云乎哉余聞而嘉之曰休茲宜輝民不忘也曩余竽
晉憲副厯上黨銅鞮間巖川灑穆想見汾陽河東旺氣
其人品犖犖千古侯其流亞歟何文武足憲也今上天
威靈重海內憾有君無臣每軍國大計面對者多奪魄
失辭侯不日升矣將以博辯之才抒淵碩之抱從容匡
贊天下事尙可爲孰謂功名減治郡時耶雖然爲兆之
仕聖人勤焉古虞詡亦令衛邑朝歌朝歌賊甯季數攻
圍長吏故舊難之詡笑曰事不避難臣之職也不遇盤
根錯節無以別利器也此乃吾立功秋也余於鏡龕父
母亦云崇禎十年歲次丁丑暮春望日

輝縣志

卷十五

藝文 記上

四十四

上黨張邑侯禦寇安民遺愛碑

曹鑑

夫詩書而擐甲胄俎豆而靖封疆自非嵩嶽誕鍾文武
爲憲其人其事胥未易言也嗟余遊秦之環慶道華州
讀槐野先生文集所稱有曰與之傳經稽理則博引而
約歸與之搦筦摛辭則宏深而奧衍與之應世効用則
措注中窾十試十功與之介胄臨戎則馭眾有術力捍
外患竊嘆當今之世難其人難其人意惟我張父母文
事武備兼優任之恢有餘地迨余旋梓里悉禦寇顛末
而益嘆嗟者所擬之非虛也耆老咸爲余言寇至以壬
申歲九月時承平久侯莅任尙未暮年戰守具一無所
恃忽流寇破修武去輝七十里而近妖氛虐焰匝地

天棄子拋家陶哭振野人心洶洶胆裂走不知所往我侯獨鎮之以靜傳點民兵則皆股栗聲嘶凜流肝赤執棘矜而蝸蟻嗜我侯獨應之以閑授兵登埤則多斷堞頽垣人無固志我侯獨結之以忠義而晝巡夜警飢不遑食困不敢眠人人疲憊我侯獨厲之以精勤如是者十宵旦自非精神萬倍忠義一腔豈能與於斯哉寇稍退我侯卽貯礮礮請砲銃修埤堦鑿品坑製火礮布灰瓶募勇壯練鄉兵瀝胆披肝馮牙誓眾而且漸言戰矣人或難之侯毅然曰尉繚氏有言城以守地戰以守城不戰胡守爾各整飭以待暨次年癸酉三月寇繇五龍口來侯督百總秦邦彥等在九峯山對壘殺賊三奪

輝縣志

卷十五

藝文記上

四十五

獲騾馬六五月寇繇林慮來侯督千總王光國等在井峪口對壘砲打殺賊四鄉兵楊可山手刃賊一六月寇復繇林慮來侯再督光國等在公子山對壘射中賊九獲馬十箭一百束有三七月寇繇淇門來侯督千總楊得安等在滑山殺賊賊遁逃獲騾馬四九月寇夜發逼我西關侯躬冒矢石扞禦夾攻賊宵遁十一月寇繇山西鐸河來侯督百總郭強等同昌鎮兵在焦泉營對壘斬級五百有七救回難民無算十二月河冰結寇始南流而遺孽滋多歲乙亥三月侯復躬勦土寇於侯兆川陣斬賊帥毛二賊痛哭去始不敢再犯輝境夫古之人能爲民捍大患則祠之我侯可稱捍大患矣叔孫言

不朽有三立功居一我侯可稱功不朽矣微我侯輝民
之禍尙忍言哉願銘功於石以比畏壘余曰嘻爾能銘
侯之功亦不能盡侯之功爾能銘爾之心亦不能銘侯
之心夫侯之心上憂國憂下憂民憂而不求銘焉者也
況今聖天子拊髀而思推轂將相大臣侯方且出其偉
畧射猱猱戮鯨鯉掛旆天山揚戈窟撰中興之頌勒
燕山之銘揆藻於玉畧金門標名於瑯函麟閣茲之禦
寇特爲之兆焉耳雖往者槐野所稱未罄厥美而區區
石刻謂足壽侯功於無窮也哉耆老默然爲問曰今日
之石誠不足以壽侯之功而我侯之功則實足以壽石
請以今日壽公之石垂萬億年壽石之公可乎余笑曰

輝縣志

卷十五

藝文 記上

四十六

斯言其庶乎侯諱克儉字禹型號靜龕上黨人與豚子
蘊清同登辛未進士余爲治民有年誼故不惜鄙俚括
其言爲記崇禎丁丑五月朔日

馬均孫
錕採訪